

Kunengozi yokuncipha kokudla ngo-2030

PHILI MJOLI

UMA abalimi bebhaka uhulumeni kuphela ukuthi abaxhase ngemali, ukukhiqizwa kokudla kuzokwehla kakhulu eminyakeni ewu-15 ezayo.

Lokhu kushiwo nguMnuz Mazwi Mkhulisi wenhlangano engenzi nzuzo ehlanganisa ababuyiselwa umhlaba ngohlelo lukahulumeni nabatshali zimali abazimele, iVumelana Advisory Fund (VAF).

UMkhulusi ubesho lokhu ngesikhathi kunomhlangano wokwethulwa kocwaningo olwenziwe yinhlangano yakhe ngezinto ezingenzeka ohlelweni lokubuyiselwa komhlaba kubantu ngo-2030 eThekwini izolo.

Uthe ukuncipha kokukhiqizwa kokudla kungaholela ekutheni ukudla okuningi kuthengwe emazweni angaphandle.

“Uma ukudla sekuthengwa ngaphandle kuzobiza, iningi labantu bazobulawa yindlala. Kumanje isimo sezomnotho esintekenteke senza ukuthi kube nabantu abaningi abalala bengadlile. Okwamanje akucaci ukuthi isimo sezomnotho singase sibe ngcono nini kodwa basekhona abatshalizimali abazimisele ukutshala imali ezinhlelweni ezithile. Kumele sisebenzise ithuba ngoba kungenzeka isimo siye ngokuya siba manzonzo,” kusho uMkhulisi.

Uthe iVAF yenze ucwaningo ngokubambisana nezinhlangano nabathintekayo ekubuyisweni komhlaba kusukela ngoMashi 2015 kuya kuMashi 2016.

Ngokocwaningo zine izinto okumele ziqashelwe kakhulu: ukudlanga kosomathuba abasebenzisa ukwaziwa kwabo kwezepolitiki ukuze bathole umhlaba ngenkohlakalo,

inkinga yokuthi abamnyama bakwazi ukudayisa imikhiqizo yabo ezimakethe, isimo sezulu nokushoda kolwazi

“Umkhakha wezokubuyiselwa komhlaba osondelene kakhulu nowezolimo ugwele abantu abafuna ukuzuzwa ngokungemthetho. Kumanje amapulazi amaningi ayekhiqiza ukudla ngaphambi kokuthi abuyiselwe kubantu awasebenzi,” kusho uMkhulisi.

UMnuz Ray Khanyile obemele ikomiti lomhlaba i-Emagcekeni eMgungundlovu uthe okunye okunomthelela ekutheni kungakhiqizwa ngendlela efanele emapulazini wumbango wokuphatha ohambisana nenkohlakalo.

“Kunabantu abafuna ukushintsha umhlaba wokulima basike kuwo iziza ngoba bejahe imali esheshayo. Maningi amapulazi asephenduke indawo yokuhlala. Ucwaningo alungimangazi, ngempela uma lesi simo siyekwa ngo-2030 bayobe bebancane kakhulu abakhiqiza ukudla emapulazini abawabuyiselwa uhulumeni,” kusho uKhanyile.

Ngakolunye uhlangothi uMnuz Peter Setou, ilungu le-VAF, uthe isimo sezulu esishintshashintshayo naso kuvela ukuthi sisazolokhu siqhubeka nokucindeza abalimi.

Ngasohlangothini lokulandelwa kwemithetho kulindeleke ukuthi ngo-2030 abantu abangabanikazi bomhlaba babe sebekuqonda kangcono ukusebenza kwawo uma kuqhathaniswa namanje kodwa umhlaba wokulima uyobe ungasekho.

UMnuz Khetha Nzimande wophiko lwezemihlaba kwaSouth African Sugar Association (SASA) uthe bakhethe ukusebenzisana neVumelana ukuze kuhlomule abalimi bomoba.